

Cun eglis aviarts tras la veta

Leandro Zamuner da Breil ei staus dall'otra vart dil mund

DA GIUSEP VENZIN / ANR

■ **Leandro Zamuner numna il viagiari da ses hobis. La stad vargada ha el fatg in viadi da bunamein 20 000 kilometers. Cun in Airbus A380 – in avion cun plaz per 853 persunas – ei igl um da Breil viagiava da Turitg via Singapur ad Auckland en Nova Zelanda.** Il scolar alla Scola mercantila Surselva ha tschercau il pli grond marcu dalla tiara dil tschunavel continent per sepefecziunar el lungatg engles. La Scola mercantila Surselva possibilitescha a tut ils scolars la scolaziun d'engles egl'exteriur denter il secund e tierz onn da scola e sustegn la scolaziun finanzielmeins. In meins ha igl um da 25 onns passentau dall'otra vart dil mund ed ei turnaus cun in sacados plein impressiuns.

In humor tut aparti

Leandro Zamuner ei tschoc. «Mes eglis ein sut meis'en», ha el detg duront in discurs ella scola mercantila ed ha priu la canna da tschocs sin meisa. Igl um da Breil sa organisar detg bein sia veta ed el ha in humor tut aparti. En sia reportascha dil viadi cuagl'aviun grond ha el scret: «Il personal ei staus honzels cun mei. Auch ein blinder Passagier wird gut behandelt.» Buca mo il personal digl'airbus ei staus honzels cun el, era da ses conscolars alla scola mercantila ha el in bien meini. Il temps ch'el passentava la scola da tschocs a Zollikofen el cantun Berna havevi el in pregiudezi: «Jeu erel dil meini ch'ils scolars da mer-



Leandro Zamuner da Breil ha passentau in meins en Nova Zelanda e frequentau leu ina scola d'engles.

FOTO G. VENZIN

cantil tegniens tuts il nas ad ault.» Che quei ei buc aschia ha el allura encurschiu beinspert.

Primavera proxima finescha Leandro Zamuner la scola mercantila. El ei gia alla tscherca d'ina plazza e luvrass bugen en in uffeci cantunal. Igl um che ha passentau ils emprems quater onns da sia veta en Brasilia survegn ina renta. «Jeu numnel quei buc in stuer luvrar, mobein

in astgar luvrar», curregia el mei silla domanda schebein la renta tonschi per vegnir tras la veta.

Filosofar el tren

Il giuven da Breil va bugen cul tren. Pli ras ga eis el viagiava cul Glacier Express ed ha udiu leu dils auters passagiers dalla bellezza cuntrada. Sil tschancun da Tavanasa a Cuera enconuscha el mintga stor-

ta. Sin quels viadis lai el anavos ils quitaus e carga nova energia. «En mes patrats sefatschentel jeu cun memez e culs concarstgauns. Jeu filosofeschel.» Meinsvart accumpogna in amitg el sin quels viadis ch'ei scapeschia ils pli bials. Il giuven da Breil ha ina abbonament general ed aschia sedatti ch'el ei ina sera a Turitg per magliar ina pizza. Liung'uriala para Leandro buca d'enconuscher, per-


tgei s'entupar cun cameratas e camerats ei in auter da ses hobis. «Allas giuvnas mirel jeu els eglis e negliu auter.» Leandro Zamuner ei in furbaz e quei fa el ordvart simpatics. Ed el appreziescha la libertad da saver viagiari en Svizra nua ch'el vul e gauda il sustegn d'amitgs e dalla famiglia.

Alla tscherca dall'aventura

Che Leandro Zamuner ha tschercau la Nova Zelanda per sepefecziunar el lungatg engles munta era ch'el tscherca bugen l'aventura. «Jeu enconuschevel negin, havevel insumma negina idea tgi e tgei che seigi entuorn mei.» Quei ei allura sedau spert: «Tuts eran honzels e plein humor», descriva igl'aventurier la famiglia hospitonta. La scola d'engles ha igl um da Breil absolviu en ina classa multiculturala. «Ei haveva Arabs, Tailandes, Columbianes, Mexicanes ed in Brasilian.» Ils conscolars, independent dalla naziun, ein segidai cul scolar svizzer e suenter duas jamnas eis el staus trests che la scola era gia alla fin. Il diplom d'engles ha conscolau el. Dapli engles ha Leandro Zamuner aunc empriu dil guid che ha menau el ina jamna el marcu ed ella cuntrada. «El ha declarau a mi ils detagls ed jeu hai saviu far in maletg.» In maletg dalla mar, da cascadas, d'auters animals, d'auters friads e d'ina outra atmosfera. Leandro ei turnaus bugen a casa, mo el fust era staus bugen pli ditg a Nova Zelanda. «Igl ei stau ina buna experientscha.» Senza dubi, Leandro Zamuner va cun eglis aviarts tras la veta.

reclama

Jetzt an die Urne! 3xNEIN



3xNEIN, c/o CVP Schweiz, Postfach 5835, 3001 Bern

NOS LECTURS RAPPORTAN

Surdada dil bon dil di da cuschinar da «Gilda» a Glion

Pils cuschiniers dalla Gilda dalla Surselva vegn il datum dils 15 d'october a restar en buna memoria. Igl ei stau in success complein ed in numerus pievel ed oravontut ils magliabien han dau suatientscha agl'invit e visitau ils treis cuschiniers dalla Gilda sin il plaz sper la fontauna el center dil marcu da Glion. Els han schau gustar il su-per risotto e pagau per tal buca mo il giavischau, na, pil pli eisi vegniu pagau bia dapli per aschia segidar e dar susteniment als pertuccai dad MS sco era per instituziuns caritativas. Els organisaturs dil risotto san sezs decider nua che la mesadad dallas entradas vegn sponsorada. E veramein, en tut eisi vegniu en ina biala summa netto da 3000 francs.

Damai ch'il hotel Posta da Rueras sesanfla gest datier dalla casa Soldanella ha il meinafatschenta e cau da tala, Hans Peter Brun, astgau prender encunter ils 5 da november in bon en la valeta da 1500 francs. Ils representants dalla Gilda ein vegni beneventai cun in bien caffè sco era cornets ed han giu la caschun dad admirar il menaschi dalla Soldanella. Igl ei veramein in bi gèst ch'ei vegn segidau cun talas instituziuns caritativas. L'otra mesadad da 1500 francs vegn messa a disposiziun pils pertuccai dad MS. Cheutras speran ils cuschiniers ch'els vegni era risguardai dad interessents che han gust da visitar in restaurant ni l'auter da tal gener. Sco gia menziunau pli baul stattan qualitad ed ambient el center da tuttas breigias. La Gilda dat garanzia per la qualitad, creativitat sco era hospitaliad. Las fatschentas da Gilda enconusch'ins entras lur signet ed ei vala la peina d'appreziar tal.

Norbert Vinzens



La surdada dil bon: Corina e Guido Sgier, Postigliun Andia, Corsin Cavegn, Posta Rueras, Imelda e Toni Darms, ambassadurs dalla Gilda dil Grischun, René Meyer, Posta veglia a Laax (maunca sin la foto) e Hans Peter Brun, meinafatschenta dalla Soldanella. FOTO C. MONN